

Date – 27/12/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Sorkar chuan Lunglei High Power Committee (HPC) thiat tura rawtna awm chu pawm rih lovin zir chian ni se a ti.**
- 2. Kumin chhung hian ruihhlo hmansual vangin Mizoramah mi 62 an thi tawh.**
- 3. December ni 19 atanga nimin thlengin African Swine Fever avangin vawk pahnih chauh a thi a, hemi chhung hian vawk damlo suat a awm tawh lo.**
- 4. Prime Minister hlui Dr Manmohan Singh chu nizan khan New Delhi-ah a thi.**

<><><>

LUNGLEI HPC

Sorkar chuan Lunglei High Power Committee (HPC) thiat tura rawtna awm chu pawm rih lovin zir chian ni se a ti.

Tun hnai a council of ministers thutkhawmah hemi chungchang hi ngaihtuah tur zingah lutin Lunglei Municipal Council (LMC) a awm hma kha chuan High Power Committee hi thil tula ngaih a ni a. LMC a lo awm takah chuan thuang hniha awm zel hi a tul tawh lova ngaihna avangin tihtawp ni mai se tih rawtna a lut a. Heih lai hian Lunglei a tlawmngai pawl hrang hrang December ni 19-a inhmukhawm chuan council of ministers thukhawmin Lunglei HPC thiahna tur rawtna a ngaihtuah dawn tih an hriat thu leh a tawp thlenga dodal an tum thu an puang a. Hetiang hi a nih tak avangin December ni 20 a council of ministers thukhawm chuan HPC thiat tura rawtna hi pawm lovin zir chian leh phawt ni se a ti ta a ni.

<><><>

PWD

Mizoram PWD hotute chuan kawngpui thar siam hmabak, a vai a belkhawma kilometer 833 leh metre 85 a thui an neih thu an sawi.

Akashvani Aizawl correspondent zawhna chhangin Mizoram PWD hotute chuan PMGSY ruahmanna thar, PMGSY-III hnuaiah kawng 17, a vaia belkhawma kilometer 487.50 a thui siamna tur sum ruahman, cheng vaibelchhe 469 leh nuai 62 an hmuh tawh thu sawiin a thawktu tur contractor

pawh thlan fel an nih tawh bakah hna tan thuai tura an inbuatsaih mek thu an sawi a. Hei bakah hian PM- Devine hnuaiiah Aizawl By-Pass (Aizawl tlak lam) siamna tur atan cheng vaibelchhe 500 an hmuh tawh thu leh contractor pawh thlang fel tawhin hna thawhna tur thuthlung pawh ziah fel thuai tum a nih thu an sawi.

Mizoram PWD hotute hian Finance Commission 16-na chu kawngpui kilometer 307 leh metre 80-a thui siamna atana sum ruahman cheng vaibelchhe 1,142 leh nuai 32 chu an dil thu leh hmuh ngei an inbeisei thu an sawi a, hei bakah hian NABARD hnuaiiah kawng panga a vai a belkhawma kilometer 38 leh metre 55 a thui siamna tur detailed project report cheng vaibelchhe 67 leh nuai 24 an thehluh chu sanction an la hmuh loh thu an sawi bawk a ni.

<><><>

DRUG RELATED DEATHS

Kumin chhung hian ruihhlo hmansual vangin Mizoramah mi 62 an thi tawh.

Excise & narcotics department chhinchhiah danin kumin January thla atanga tun thleng hian ruihhlo vangin mi 62 an thi tawh a, ruihhlo hmansual avanga thite hi mipa 54 leh hmeichhia 8 an ni. Hemi tiam hian kum 1984 a heroin vanga thi pakhat chhinchhiah a nih atanga tun thleng hian Mizoramah ruihhlo vanga thi zat hi 1,874 an tling tawh a, mipa 1,649 leh hmeichhia 225 an ni a. An zinga 1,161 hi spasmo proxyvon leh parvon spa vanga thi an ni a, mi 268 chu heroin vanga thi an nih lai-in damdawi hman pawlh vanga thi hi mi 445 an awm bawk ni a chhinchhuah a ni. Kum 1984 atanga kum 1989 thleng khan spasmo proxyvon vanga thi an la awm lova, heroin vanga thi hli an ni a, damdawi dang leh a chawlpawlh avanga thi hi kum 1984 leh 1998 thleng khan an awm lo bawk.

Nachhawkna chak tak proxyvon leh parvon spa hi sorkar laipui-in siam a phal tak loh avangin hemi damdawi ei avanga thi hi an tlem chho tial tial a, kum 2017 atanga tun thlengin an awm leh tawh lo. Ruihhlo vanga thi an tam ber kum chu 2004 kha a ni a, hemi kum hian mi 143 an thi a, kum 2000 khan 139 thi-in kum 2003 khan mi 136 an thi bawk a. Thite hi tlem te tih loh chu proxyvon leh parvon spa vanga thi deuh vek an ni.

Kum 2016 khan heroin avangin mi 36 an thi a, hemi tih loh chu kum tinin damdawi chi hrang hrang hman pawlh avanga thi an tam ber chho zel a, nikum phei kha chuan thi zawng zawng 76 kha damdawi chi hrang hrang khawih pawlh vanga thi vek an nih thu excise & narcotics department hotute chuan an sawi a ni.

<><><>

MPCB

Mizoram Pollution Control Board chuan Krismas lawmna kal mekah hman khat daih plastic leh tlukpuite hmang lo turin Kohhran tin leh mtin an ngen.

Mizoram Pollution Control Board hotuten Akashvani News Aizawl an hrilh danin Mizoram chhung, a bik takin district khawpuiah te kum dangah Krismas leh Kumthar lawmna a thingpui leh a hmeh sem kualna leh ruai thehna chaw thleng atan hman khat daih plastic chu hman a nih thin thu an

sawi a. Hei hian bawlhhlawh tam tak siam belhin bawlhhlawh sangbawl kawngah pawh tawih thei lo a nih avangin bawlhhlawh a let a a tih tam thin thu an sawi a. Kohhran tin leh mi zawng zawng hemi kawnga harh thar a sil fai theih emaw leilung a tawih mai thei no leh chaw ei thleng a tam thei ang ber hmang hram tura an ngen thu an sawi bawk.

Mizoram Pollution Control Board hotute chuan Sorkarin a halpuah leh puak thei thil dang Krismas lawmna bikah hriattur a awm lo chu lawmawm an tih thu an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Chaghnu dar 2 leh a chanve-ah Chanchinthar puan leh a ni ang.

<><><>

OIL TANKER FIRE

Nizan hmasa dar 8:50 vel khan Vairengte Police Checkgate bulah tuialhthei phur lirthei chu a kang a, a kan chhan erawh hriat a nilo.

He tank lorry hian Silchar atangin JKL Filling Station, Vairengte a mi tur diesel litre 4,000 a rawn phur chho a, Vairengte Police check gate-a hming an ziah luh hnu a Mizoram lam pan a an tlan leh tur chu tank lorry driver hian motor engine a tih nun hnuah motor hi a hnuai lam atangin a rawn kang tan ta mai ni a thu dawn a ni. Tank lorry kanna hi police check gate atanga teh a meter 70 vela hla ah a ni a, Vairengte Police leh mi tlawmngaite'n Vairengte a kang thelh pawl phone nghalin Vairengte kang thelh motor an tih nun lawk theih loh avangin Vairengte Police te hian Dholai OC chu kang thelh motor rawn tir chho turin an be pawp nghal a. Zan dar 10 velah Lailapur atangin kang thelh motor a rawn thleng a hemi hnu zan dar 11 velah Vairengte kang thelh motor a thleng bawk a, lirthei kang hi thelh mih a ni ta a ni. Lirthei kang khalhtu leh a handyman bakah an mi phurh pakhat te hi hliam tuar lovin an in saseng hman a, diesel engemaw zat pawh a kang bang bawk.

<><><>

ASF UPDATE

December ni 19 atanga nimin thlengin African Swine Fever avangin vawk pahnih chauh a thi a, hemi chung hian vawk damlo suat a awm tawh lo.

November thla atanga African Swine Fever (ASF) vawk pulhri lengin zia-awm lam a pan hnu-ah December thla laihawl atangin vawk thi leh suat a tlem chho hle tawh a. December ni 18 khan Lunglei district a Ramlaitui khua-ah vawk 32 a thi a, a khaw thenawm lawk Mualthuamah 2 a thi bawk a, hemi ni hian pulhri vangin vawk 34 a thi a, vawk damloh avanga talh a awm lo. A tuk December ni 19 khan vawk 1 a thi leh a, December ni 23 khan 1 dang a thi leh

a, vawk damlo talh erawh chu a tawh awm lo. Heti hian kumin February ni 9 a Champhai district Leithum khua a ASF vawk pulhri vanga thi an finfiah hnu a vawk thi zawng zawng chu 14,950 a tling tawh a, vawk suat zat hi 24,177 a tling tawh bawk a ni.

Vety department hotute chuan thlasik hnu-ah hi chuan ASF vawk pulhri hian zia-awm lam panin thunun theih thuai an beisei a ni.

<><><>

MANMOHAN SINGH PASSES AWAY

Prime Minister hlui leh economics thiam Dr Manmohan Singh chu nizan khan New Delhi-ah a thi.

Manmohan Singh hi a thih hian kum 92 mi a ni a, a nupui Gursharan Kaur leh a fanute pathum a kalsan a ni. A hriselna dinhmun a that loh avangin Manmohan Singh hi nizan dar 8 khan All India Institute of Medical Sciences (AIIMS)-ah dah luh a ni a. Ni khaw hre lova a awm hnu-in nizan dar 9 leh minute 51 khan a kal ta a ni.

Manmohan Singh hi Prime Minister PV Narasimha Rao hnuai a Union Finance Minister hna a chelh tan kum 1991 atanga India ram economy chhuah zalena siamthatu ropui a ngaih a ni a, Congress kaihhruai UPA sorkarah khan kum 2004 atanga 2014 thleng term 2 chhung Prime Minister hna a chelh a ni. Kumin April thla khan kum 33 zet Rajya Sabha member a nihna atangin a chawl a. September ni 26, 1932 khan Punjab-ah piangin India ram Prime Minister 13-na a ni.

<><><>